

Allannguutissatut siunnersuut

uunga

Uunga siunnersuut: Inunngortunik toqusunillu nalunaaruteqartarneq, ilisinerit iliveqarfiillu pillugit Inatsisartut inatsisaat nr. xx, xx 2016-imeersoq.

Naalakkersuisunit pingajussaaneerinermi saqqummiunneqartoq.

§ 7-imut

1. § 7 imatut oqaasertalerneqassaaq:

” § 7. Toqusup timaanik ikuallaaneq toqusut timaannik ikuallaasarfinni pissaaq, avatangiisit illersorneqarnissaat pillugu Inatsisartut inatsisaat naapertorlugu tamatumunnga akuerisaasuni, taamaattoq takuuk § 37, imm. 3, imaluunniit toqusup timaanik ikuallaavinni Kalaallit Nunaata avataaniittuni, nunami pineqartumi pisortanit akuerisaasuni.

Imm. 2. Arsat qummuattaq atorlugu ilineqassapput imaluunniit siaruarterneqarsinnaallutik kapitali 3-mi tamatumunnga malittarisassat naapertorlugit. Qummuattat arsanik imaqtartut, ilineqarnissami imaluunniit siaruarterneqarnissami tungaanut taamaallaat palaseqarfimmi toqqortarineqarsinnaapput, taamaattoq takuuk imm. 3.

Imm. 3. Naalakkersuisut tamanna pillugu Biskoppi isumasioreerlugu aalajangersagaliorsinnaapput utaqqiisaasumik qummuattap palaseqarfimmi pinnani allamili toqqortarineqarsinnaanera pillugu, qummuattap nunamut ilineqarnissaata tungaanut imaluunniit arsat siaruarterneqarnissaasa tungaanut.”

§ 15-imut

2. § 15 imatut oqaasertalerneqassaaq:

” § 15. Qummuattat toqusup timaata arsaanik imaqtartut palasip ajoqilluunniit pisuni ataasiakkaani innersuussineratigut iliveqarfinni tamani ilineqarsinnaapput.

Imm. 2. Biskoppi immikkut ittutigut pisinnaatitsisinnaavoq arsat allatut pissusissamisoortumik isumagineqarsinnaasut, tamatumani aamma akuersissuteqarsinnaalluni arsat qummuattamiittut siaruarterneqarsinnaasut Kalaallit Nunaata ilaani, taamaattoq takuuk imm. 3.

Imm. 3. Naalakkersuisut tamanna pillugu Biskoppi isumasioreerlugu malittarisassiorsinnaapput, qanoq arsanut pissuserissaartumik periaaseqartoqarsinnaanersoq pillugu, tamatumani aamma arsat qummuattamiittut Kalaallit Nunaata ilaani sumiiffimmi siaruarterneqarsinnaanersut, aammalu akuersissummik tunniussinissamut qinnuteqaammut aqqissuussamik piumasaqaataasinnaasunut tunngatillugu.”

§ 36-mut

3. § 36, imm. 1. imatut oqaasertalerneqassaaq:

”Akiliisitsissummik pineqaatissiisoqarsinnaavoq §§ 1-3, §§ 5-6, § 7, imm. 1-2, § 12, imm. 1, § 26 aamma § 27, imm. 1 aamma 2 unioqutitsisoqarpat.”

Inatsisissatut siunnersuummut oqaaseqaatit

Nalinginnaasumik oqaaseqaatit

Allannguutissatut siunnersuut nassiunneqarpoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuutip aappassaaneernejarnissaanut atatillugu isumaliutissiissutaa tunngavigalugu.

Ataatsimiititaliap isumaliutissiissutimini Naalakkersuisut kaammattorsimavai arsat qummuattamiittut paarineqartarnerannut atatillugu eqaatsumik periaaseqarnissaannut arsanillu siaruarterisarnermi toqusup ilaquataasa kissaataannut atatillugu. Ataatsimiititaliaq isumaqarpoq Naalakkersuisut tamanna naapigiartariaqaraat allannguutissatut siunnersuuteqarnikkut, siunertaqartumik toqusup arsaanut qummuattamiittunut taakkualu siaruarterneqartarnerannut piomasaaqatit eqaannerunissaat. Ataatsimiititaliallu tamatumunnga atatillugu innersuuppaa Kalaallit Nunaanni innuttaasut ikittunnguunerat, avatangiisinut isorartuunut najugarineqartunut sanilliullugu.

Ataatsimiititaliap qummuattap toqqortarineqarnissaanut malittarisassanut tunngatillugu nalunaarsimavaa inatsit periarfissaqartitsisariaqartoq immikkut akuersissuteqartoqarsinnaaneranut toqusup ilaquataasa qummuattamik tigummisinnaaneranut innimisuttumik inissiilluni, nammineq pissusissamisoortutut isigisaminni.

Naalakkersuisut ataatsimiititaliap isumaliutissiissutaa tunuliaqutaralugu Biskoppimik ataatsimeeqateqarsimapput, tusarumallugu Biskoppip oqaaseqaatigiumasai allannguutissatut kissaatigineqartunut, oqaloqatigiissutigiumallugulu qanoq aaqqissuussinikkut ataatsimiititaliaq naapertuuttumik naapigiarneqarsinnaanersoq, periaasissamillu aaqqissuussisoqarsinnaanersoq.

Biskoppi tamatumunnga atatillugu nalunaarpoq pingaaruteqartoq malittarisassani toqoreersup ataqqineqarnerata attatiinnarneqarnissaa. Taamaattumillu Biskoppi isumaqarpoq mianersuuttariaqartoq qummuattamik palaseqarfiup avataani toqqortaartoqarsinnaaneramik ammaassinisaaq. Ilutigisaanilli Biskoppip paasilluarsinnaavaa pisoqarsinnaammat qimataasut anersaakkut aliasunnerminnut atatillugu periarfissaqartariaqartut qummuattamik paarsinissamut, taassuma iliverneqarnissaata arsalluunniit siaruarterneqarnissaasa tungaannut. Qummuattamilli paarsineq sivikitsunnguussariaqarpoq, sapaatillu akunnera qaangernagu sivilisussuseqarluni.

Arsanik siararterisinnaanermut atatillugu Biskoppip oqaatigaa aallaavittut kissaatigineqartoq maannamutut kalaallit imartaanni arsanik siararterisinnaaneq periarfissaaginnartariaqartoq, kisiannili pissutsit tunngavigalugit eqaatsumik aqqissuussisinnaaneq akuerineqartariaqartoq, qularnaarneqarpat tamanna pissasoq sumiiffinni inuit tamat atugaannut akornutaanngitsuni, allallu peqqissusiannut nalornisitsiviusinnaanngitsuni. Eqqaamaneqassaarlu aamma toqusup ataqqineqarnissaa isiginiarneqassammat. Qaqqani arsanik siararterisinnaaneq ammaanneqassappat qularnaarneqartariaqarpoq tamatuma ileqqorissaarluni ingerlanneqarnissaa, aammali tamatumunnga atatillugu inuit namminneq iliveqarfiinik eqqaassutissaateqarfiinillu pilersitsiortortoqannginnissaa.

Tamanna pillugu Biskoppi isumasioreerlugu Naalakkersuisut pissusissamisoortutut nalilerpaat ataatsimiititaliamit kissaatit naapigiarneqarnissaat pissusissamisoornerussasoq marloqiusamik aqqissuussinikkut, ilaatigut inatsisip oqaasertaanik allannguinnikkut aammalu nalunaarusiornikkut ersarinnerusunik malittarisassiorsinnaalernikkut.

Inatsisip oqaasertaani namminermi ammaanneqassaaq qummuattamik toqqortaqaarsinnaanermut malittarisassamik saneqqutsisinnaaneq (§ 7, imm. 2), aamma malittarisassaaq biskoppip pisuni immikkut ittuni ileqqorissaartumik tunngavilimmik pisinnaatitsisinnaanera, allatut arsanut tunngatillugu periaaseqartoqaarsinnaaneranut, tamatumani aamma pisinnaatitsisarnerni arsat qummuattamiittut kalaallit imartaanni siararterneqarsinnaanerannut (§ 15, imm. 2).

§ 7, imm. 2-mi oqaaseqatigiinni kingullerni oqaaseqatigiinnik nutaanik ilanngussisoqassaaq, ”taamaattoq takuuk imm. 3”. Ilutigisaanik immikkoortoq 3-mik ikkussisoqarpoq. Tassani aalajangiunneqarpoq Naalakkersuisut Biskoppi isumasioreerlugu malittarisassiorsinnaasut qummuattap palaseqarfiunngitsumi toqqortarineqarallarsinnaaneranut, qummuattap assaanneqarnissaata tunngaanut imaluunniit arsat siararterneqarnissaasa tungaannut.

§ 15, imm. 2-mi, oqaaseqatigiinnik taamatulli ikkussisoqarpoq ”taamaattoq takuuk imm. 3”. Tassani aalajangersarneqarpoq Naalakkersuisut Biskoppi isumasioreerlugu malittarisassiorsinnaasut, qanoq arsanik ileqqorissaartumik periaaseqarluni isumaginnittoqaarsinnaanersoq pillugu, tamatumani aamma arsat qummuattamiittut siararterneqarsinnaanerannut pisinnaatitsissummi piumasaaqatit, tamatumani aamma akuersissummik tunniussinermi Kalaallit Nunaata ilaani arsat qummuattamiittut siararterneqarsinnaanerannut piumasaaqatit, pisariaqarpallu qinnuteqaasiornermi periaasissanut piumasaaqatinik.

Periaasissatut siunnersuummi periarfissiisoqarpoq kissaatigineqartutut eqaatsumik kissaatinut periaaseqarsinnaanermut, malittarisassanut atatillugu, aammalu ileqqorissaarnissamut peqqissutsimullu tunngasutigut malittarisassiornermi isiginiagassanut atatillugu. Kiisalu aamma malittarisassat atortsinneqarneranni malitsinneqarnerannilu allaffissornikkut allatigullu

isumagisassat peqqissaartumik misissorneqarsinnaallutillu suliarineqartarsinnaassapput. Isiginiaraanni pingaarnertut pissuserissaarnissamut tunngasut, ilagiit soqutigisaqartullu allat tusarniarneqarsinnaasut, aaqqissuussineq aamma periarfissivoq kissaatigineqartutut eqaatsumik ingerlatsinissamut, ammasumik peqataatitsisumillu periaaseqarnikkut.

Siunnersuut nammineq allaffissornikkut aningaasaqarnikkulluunniit pisortanut kinguneqartussaannngilaq.

Inatsisissat siunnersuummi aalajangersakkanut ataasiakkaanut oqaaseqaatit

Nr. 1-imut

Aalajangersagaq ilanngunneqarpoq tamarmiutillugu, allannguutissatut siunnersuutigineqartut sumut atasuuneri ersarissumik takuneqarsinnaaqullugit. Imm. 1 allanngortinnagu atatiinnarneqarpoq.

Imm. 2-mi oqaaseqatigiinni kingullerni ilanngunneqarpoq; ”taamaattoq takuuk imm. 3”. Aalajangersagaq siunertaqarpoq erseqqissaanertut, malittarisassat imm. 3 naapertorlugu saneqqunneqarsinnaasut.

Imm. 3 nutaajuvoq. Pineqarpoq Naalackersuisunut pisinnaatitsissut, Biskoppi tamatumunnga atatillugu isumasioerlugu malittarisassiortoqarsinnaasoq, utaqqiisaasumik qummuattap palaseqarfiup avataani paarineqarsinnaanera pillugu.

Pissusissamisoortinneqarpoq malittarisassat aalajangersarneqarnerat pissasoq Biskoppip isumasioererneratigut, qularnaarumallugu Oqaluffiup isummersuutai ilanngunneqassat kimeqartinneqassasullu, malittarisassat ilusilersorneranni.

Oqaasertaliineq ”utaqqiisaasumik... toqqortarineqarsinnaanera” paasineqassaaq § 7, imm. 2-mi oqaaseqatigiinnut kingullernut naapertuuttumik. Taamaasilluni taamaallaat pineqarpoq sivikinnerusumik toqqortarinnittoqarsinnaanera, qummuattap ilineqarnissaata imaluunniit arsat siaruarterneqarnissaasa tungaannut.

Oqaasertaliineq ”palaseqarfimmi pinnani allamili” aallaavittut ammaassivoq utaqqiisaasumik toqqortarinninnerup sumiiffinni assigiinngitsuni pisinnaaneranut. Taamaattoq pineqarpoq toqqortarinninneq toqusup ilaqutaani qaninnerni pisinnaasoq. Aalajangersakkap tunuliaqutaasumik isiginiagaa tassaavoq ammaassisoqassanngitsoq avatangiisini toqqissisimanartuunngitsuni toqqortarinninnerup pisinnaaneranut.

Nr. 2-mut

Aalajangersagaq ilanngunneqarpoq tamarmiutillugu, allannguutissatut siunnersuutigineqartut sumut atasuuneri ersarissumik takuneqarsinnaaqullugit. Imm. 1 allanngortinnagu atatiinneqarpoq.

Imm. 2-mi oqaaseqatigiinni kingullerni ilanngunneqarpoq; ”taamaattoq takuuk imm. 3”. Aalajangersakkap siunertaraa erseqqissaanissaq, malittarisassat imm. 3 naapertorlugu saneqqunneqarsinnaasut.

Imm. 3 nutaajuvoq. Pineqarpoq Naalackersuisunut pisinnaatitsissut, Biskoppi tamatumunnga atatillugu isumasioereerlugu malittarisassiortoqarsinnaasoq, qanoq arsat periaaseqarfigineqassanersut pissusissamisoortumik, tamatumani aamma arsat Kalaallit Nunaata ilaani siaruarterneqarsinnaanerannut akuersissuteqarnissami piumasaqaataasussat, pisariaqarpallu qinnuteqaasiornermi periaasissanut piumasaqaatinik.

Pissusissamisoortinneqarsimavoq malittarisassat aalajangersarneqarnerat pissasoq Biskoppip isumasioereerneratigut, qularnaarumallugu Oqaluffiup isummersuutai ilanngunneqassasut kimeqartinneqassasullu, malittarisassat ilusilersorneranni.

Oqaasertaliinikkut ”Kalaallit Nunaata ilaani” ammaaneparpoq arsat kalaallit imartaaniinnaanngitsoq siaruarterneqarsinnaanerannut akuersisoqarsinnaasoq, tamatumani aamma assersuutigalugu qaqqani sumiiffinni aalajangersimasuni. Oqaasertaliineq Inatsisartut peqqussutaanni atuuttumi oqaasertaliinermut naapertuuppoq.

Aalajangersakkami ammaassisoqarpoq maleruagassiortoqarsinnaanerannut arsat qummuattamiittut Kalaallit Nunaata ilaani siaruarterneqarsinnaanerannut akuersissuteqartarnermut tunngatillugu. Tamannalu assersuutigalugu imaqarsinnaavoq piumasaqaatinik, toqusup toqunissani sioqqullugu kissaatigisimagaa toqoreeruni arsami siaruarterneqarnissaat, allatulluunniit uppersarsarneqarsinnaassasoq toqusup tamanna kissaatigisimagaa. Assersuutigalugulu pineqarsinnaapput malittarisassat, pissutsit qanoq ittut ataanni meeqqat toqusut arsaasa siaruarterneqarsinnaaneratt pillugu aalajangersakkat. Aalajangersakkallu aamma ammatippaa malittarisassiorsinnaaneq qinnuteqaatip qanoq iluseqarnissaanik, tamatumani assersuutigalugu qinnuteqarnermi immersugassamik suliamut atuuttumik immersuisoqartassanersoq.

Aalajangersagaq taamaallaat arsat siaruarterneqarsinnaaneratt pillugu malittarisassiornissamut tunngasuunngilaq, kisiannili aamma arsat isumagineqarneranni ileqqorissaartumik periaaseqarnissamut aalajangersagaasinnaallutik. Tamannalu assersuutigalugu arsat avinneqarsinnaanersut sumiiffinnullu arlaqartunut siaruarterneqarsinnaanersut pillugu aalajangersakkanik imaqarsinnaavoq, qanoq pissutsit inneranni akuersisoqartarsinnaanersoq pillugu aalajangersagaasinnaallutik. Kiisalu aamma ”ileqqorissaartumik” periaaseqarnissap qanoq paasineqarnissaanut tunngasumik aalajangersagaasinnaapput.

Nr. 3-mut

Allannguutissatut siunnersuummi nr. 1-ip § 7 annertusivaa immikkoortumik nutaamik (imm. 3), taanna (§ 7, imm. 1-2-mut akerliusumik - paarlattuanik) § 36, imm. 1-imi pineqaatissiisarnermut aalajangersakkanut atasussaangimmat. Taamaattumillu allannguutissatut siunnersuutini nr. 1 kinguneqarpoq § 36, imm. 1-imi tamanna tunngavigalugu iluarsiiisoqarneranik.